



Шочмо эл, порылык да чын верч!

Будь готов!

39-ше (3635) №,
2023 ий 29 сентябрь,
кугарня.



0+

1933 ий 1 февраль годсек лектеш.

Тау пөлекетлан, ковай!



Авторын фотожо.

1 октябрьыште

Илалше-влакын тўнямбал кечыштым пайремлена. Коча-кова-шамыч кеч-кўлан шўртнў падыраш гай шерге улыт. Нуно икмыняр курым дене аралалтше арверым, чон поянлыкыштым, шочмо йылмым йўратымашыштым кушкын толшо тукумлан пўлеклат. Оршанке район Кўшыл Каракша ялеш шочын-кушшо, кызыт Йошкар-Олаште илыше кова Э.И.Дубовникован ешыштыже **(снимкыште)** «Ямде лий» газет дене эре пенгыде кылым кученыт.

– «Ямде лий» – ешыштына шужертак палыме да йўратыме газет. Школышто тўнеммем годым тушко школ илыш, йолташ, шочмо ял нерген возкаленам. Изи пашам савыкталтмеке, тунуктышем класс ончылно мокталтен. Вара Светлана ўдыремьым кумыланденам. Тудо, «Ямде лийым» шергалын, сочиненийым чын возаши тўнемын, – оила Эльвира Ивановна.

Ынде Светлана Леонидовна Князеван икшывыже-влак йоча газетым куанен лудыт. Йошкар-Оласе 9-ше номеран школышто 5-ше классыште тўнемше София ўдыржў ўмаште «Ямде лий» газет редакцийын эртарыме «Йўлам арале – тўвырам пойдаре» республикысе конкурсышто сенышыш лектын. София Коля ден Настя шольо-шўжарже-влакымат газетлан кумыланден шуктен. Ынде уло еш дене лудыт.

Х.АЛЕКСАНДРОВА.

2-12 октябрьыште

Россий мучко **Подписчикын декадыже** эртаралтеш.

Князевымт нине кечылаште шулдырак ак –

375 тенгеат 54 ыр – дене возалтнешт.

Квитанцийым редакцийышке колтен, лотерей модышышко ушнынешт. Вет тўн призше моткоч чапле –


3D ручка.

Йолташ-влак, теат вашкыза.



Рекламе.

Чодыран йолташыже улыт



Фотом интернет гыч налме.

22-24 сентябрьште «Шап» тазалыкым пентгыдемдыме комплексште школ лесничестве-влакын регион кокласе слётгышт эртаралтын. Тушко Марий Элын 14 районжо гыч 64 ўдыр-рвезе да Коми, Мордва, Чуваш, Татарстан

республиккла, Виче, Ульяновск кундемла гыч 24 тунемше ушненыт.

Йоча-шамыч командышт дене палымым ыштеныт. «Лесное многоборье» йыжынгыште шинчымашыштым практике пашаште тергеныт. Социальный рекламным ямдылыме шотышто мастарлык класс эртаралтын. Тўрлө станций еда коштын, уш-акылыштым пойдареныт. «Чодырам аралена» акцийышке ушнен, пуштыгымы шынденыт (снимкыште).

Слётын пашажым иктешлымеке рашемын: Кужэгер район Руш Шой школ лесничествын командыже сенышыш лектын.

Л.НИКОЛАЕВА ямдылен.

Сенгымаш 7-27 сентябрьыште Краснодар кундемысе Анапа олаште «Смена» всероссийский йоча рўдериште «Президентский спорт модмаш» всероссийский спорт тагасымашын всероссийский йыжынже эртаралтын. Тушто Йошкар-Оласе 1-ше номеран школын ўдыр-влак командыже регби дене тагасымаште кокымшо верым сенен налын.

Куанен тунемам

Мый кокымшо классыште тунемам. Классыште чылаже – 13 ўдыр-рвезе. Мыланна туньктышына Н.В.Николаева келге шинчымашым пуа. Ме тудын каже мутшым колыштына, ойжым шукташак тыршена. Мый школышко куанен коштам. Музыка урокым поснак йоратем.

Даша САПАЕВА.
Волжский, Сотнур.

Тагасаш келшен

Марий Турек посёлкышто куржталмаш дене шыжымсе тагасымаш да «Нацийын кроссо» эртаралтыныт. Тагасымаште Арбор школ гыч шым тунемше вий-куатнам тергенна (снимкыште). Нылымше классыште тунемше Ростислав Васинкин, тудын Росина акаже да кудымшо классыште шинчымашым погышо Максим Григорьев икымше верым сенен налыныт. А мый тыгай тагасымашке икымше гана



Фотом школ архив гыч налме.

ушненам. Кумшо верым налше деч кум секундлан кодынам. Вес гана чотрак тыршем. Мылам куржталаш келшен. Тиде тазалыклан пеш пайдале.

Линда ПРОХОРОВА.
Марий Турек,
Арбор.

Российысе увер

Ўдыр-рвезе-влак, цифровой технологийым палымыдам «Изучи интернет – управляй им!» всероссийский онлайн-чемпионатыште терген кертыда. Тушко шкетын да тўшкан ушнаш лиеш. Икымше йыжын **1 ноябрь марте** шуйна. Тўрыс увер – игра-интернет.рф сайтыште.

Почеламутым лудаш, мурым мураш, сўретлаш йоратеда? Тугеже «Почувствуй библиотеку» всероссийский конкурсшко ушныза. Тўнжө – чылажат книгагудо дене кылдалтпаш. Пашам manager@baikalib.ru адрес дене электрон почтыш **6 октябрь марте** колтыза.

1-9-ше класслаште тунемше-влаклан «Безопасные дороги» онлайн-олимпиадым увертареныт. Тудо «Учи.ру» платформышто **15 октябрь марте** эртаралтеш.

Марий Элысе увер

8-11-ше класслаште тунемше-шамычлан колледж ден техникум пелен икымше паша профессийым яра налаш йон уло. Нуно **1 октябрь гыч** тунемаш тўналыт. Тений 25 специальностьым темлат. Чылаже – 719 вер.

Республикысе йоча да самырык-влаклан технике усталык рўдериш коштышо **Данила Василенко** **Высокоскоростной телеграфий** дене тўнямбал чемпионатыште уш-акылжым терген да кумшо верым сенен налын. Тагасымаш Болгарийысе Примоско олаште эртаралтын.

«Мама и дети в национальных костюмах» тўнямбал конкурсым иктешленыт. Тушто 50 сенышым ойыреныт. Нунун радамыште – **Шернур район Чылдемыр** ял гыч **Альбина Семёнова** **Алексей** эргыже да **Юлия** ўдыржө дене пырля.

Вүлэнгерыште – шокшо вашлиймаш

Кодшо кугарнян ме, «Ямде лий» ден «Кугарня» газет редакций-влакын пашаенгышт, Виче кундем Пыканью район Вүлэнгер ялышке унала мийышна. Мемнам Виче кундемысе марий тўвыра рўдерын пашаенже-влак вашлийыч. Марий тўвырам вияндымаште, йўлам жаплаш кумылангдымаште, шочмо йылмым йўраташ туныктымаште нуно Е.П.Афанасьеван вуйлатымыж почеш кугу сомылым шуктат.

Тўвыра рўдерын пашаенже-влак мурылан, куштымашлан, кидпашалан шўман улыт. Чыланат «Ўдыр кас» ансамбльыш коштыт. Шкештат «Шонанпыл», «Снеге пеледыш», «Висвис» йоча коллектив-шамычым, «Смайлик» театр ден моло кружокым вуйлатат. Ўдыр-рвезе-влакым сылнын мураш, кушташ туныкшат. Марий калыкын кучылтмо арвержым, вургемжым поген, ончыкыжым тоштерым почаш шонат.



Сўретче деке унала

Тўвыра рўдер дене палыме лиймеке, Виче кундемын да Марий Эл Республикын сулло пашаенгышт, тале сўретче, Вүлэнгер школышто ятыр жап вуйлатышылан пашаенгыштыше В.В.Унженин деке унала тарванышна. Владимир Васильевич сўретше-влакым пўртшў мучко луктын шогалтышат, ончырыште улмыла чучо. Кажне гаяк пашаштыже сўретче марий калыкын илышыжым, марий вургемын сылнылыкшым ончыктен. Ик вере мландым куралыт, вес вере шудым тўшкан солат, кумшо сўретыште марий сўаным эртарат, нылымшыште финн-угор

калык-влак чумыргеныт. Палем, школышто пашаенгыштымыж годым В.Унженин **(снимкыште)** «Ямде лий» газет дене пентгыде кылым кучен. Тидын нерген тыге ойлыш:

– *«Ямде лий» эн йўратыме газетна лийын. Тудым мый йоча-влаклан пуэденам. Нуно пеш куанен шергалыныт. Урокиштат пайдалын кучылтынна.*

Изи, да поян

Кызыт Вүлэнгер школышто 26 йоча веле тунемеш, йоча-садыш куд икшыве коштеш. Чаманен каласаш логалеш, мийыме кечын ўдыр-рвезе-

Тушто марий йылмым шочмо йылме семын тунемит. Классыште «Ямде лийлан» пўлеклалтше онат уло. Тушан газет лаштыкка гыч пўчкын лукмо мыскара, калык пале, тушто-шамычым, тўрлў заданийым верандыме. Ўдыр-рвезе-влакым марий йылмылан Л.И.Русинова кумылангда. Школ тоштерышкышт пурет гын, шинчат шарла – моткоч поян. Тудым историйым туныктышо А.А.Чирков чумырен. Эсогыл мамонтын бивеньже аралалтеш.

Пырляште весела

Кастене «Лач пырляште весела» чапле концертыш изижат-кугужат погынышт. Концертым «Ўдыр кас», «Изи пеледыш», «Снеге пеледыш» **(снимкыште)** ансамбль-влак сўрастарышт. Тыгак Марий Эл гыч кумдан палыме мурызо-шамыч Эльвира Трифонова ден Саша Иванов калыкым сылне мурышт дене куандарышт. Концерт годым газет дене палдарышна, шочмо йылмым йўраташ кўлмў нерген ятыр ойлышна. Верысе калыклан шокшо вашлиймаш моткоч келшыш. «Тендам вес ганат вучена, толза!» – уло кумылын ўжыч.

Х.АЛЕКСАНДРОВА.
Авторын фотожо-влак.



влак ден туныктышо-шамыч турслўтыш каеныт ыле, садлан вашлийын ышна керт. Туге гынат школ директор кас велеш экскурсийым эртарыш. Эн ончыч марий йылме кабинетыш пурышна.



Тукым улына

Тылзат модеш

Кунам эше мала ялна,
Южат пеш вудыжгö, яндар,
Сирень чонан гаяк кана,
Пүя – вошткойшо ший янда,
Пий-шамыч оптымым чарнен
Ончат каваш вүташт воктен –
Ок пале тылзе, куш пураш,
Тўнале пырысла модаш.

Ончен öрат, могай кожмак!
То шогалеш унчыливуя,
То, шинчын шүдыр-влак ўмбак,
Чапажым ўлыкö шуя.
Эсогыл каважат шагал,
Төрштен вола пöртна ўмбак.
Уке, ик верыш ок шогал.
Тыгай вот писе ормамак!

Кўлеш тудлан эре шенаш:
Кўзаш-волаш, пураш-лекташ.
Антеннышке төрштен шинчеш,
Шонет, тевак шунгалт возеш.
Пеш келшыш моли

тўнык рож –
Лүддеак, вуйжым шуралеш.
Изи мардеж пуале гож –
Тылзет шүч
лонгыш шунгалтеш...

Лекмек уремышке, тўжвак,
Ончалза кўшкö, вуй ўмбак –
Ала тендан денат тыгак
Ший тылзе лийын негр гай?
Н.ЗОЛОТАРЁВ.
Кужэгер, Уштымбал.

Сылнымут пайрем чумырен

«Мый кызыт öрам, кузе марий поэтна да композиторна-влак нау-
кымат ончылтен кертыныт! Тидлан вашмут икте гына лийын кер-
теш: калыкын историйжым, тоштыен ойым пагалыме да палыме
дене», – тыге ойлен шанчызе, фольклорист В.А.Акцорин.
Серызына-шамыч ончычат, кызытат пүсö ушан да уста улыт. Лач
тыгай писатель-влак да тўналше автор ден йоча-шамыч «Сылнымут
шыже» семинар-совещанийышке погыненыт (снимкыште). Тудо
21 сентябрьыште Йошкар-Олаште Йылмым, литературым да исто-
рийым научнын шымлыше В.М.Васильев лўмеш марий институтыш-
то эртаралтын. Тений семинар классик Я.П.Майоров-Шкетанын шоч-
мыжлан 125 ий теммылан пöлеклалтын.



К. АРХИПОВА Н. фотожо.

Сылнымут пайремым
почмаште Марий Эл Респуб-
ликысе тўвыра, печать да ка-
лык-влакын пашашт шотыш-
то министрын алмаштышыже
М.И.Матвеев тыге ойлен:

– *Йоча-влаклан савыкталт-
ше марий газет ден журнал-
влак Российыште ончыл
радамыште улыт. Нуно са-
мырык тукымым сылны-
мутлан шўмандымаште кугу
сомылым шуктат. Ты кор-
нышко шогалында гын, мот-
коч чын ыштенда. Ончы-
кыжым те Россий писатель
ушмын Марий Эльсе пöлка-
жын еҗже лийын кертыда.
Возымо пашада-влакым тўр-
лö вере савыкташ йöн уло.
Возаш веле ида öркәне.*

Семинарыште йоча ден
кугыен-влак сылнымут сас-
каштым кумдан палыме серы-
зе-шамычлан ончыктен да
акым налын кертыныт. Тыге
тўрлö секцийыште паша
шолын. Йоча-влак дене «Кече»
журналын художественный
редакторжо Кристина Ар-
хипова ден серызе Елена
Юнусова пашам ыштенит.
Нуно шке книгашт дене пал-
дареныт да сылнымут дене
кылдалтше мастер-классым
эртареныт. Йомакым возы-
машлан поснак кугу тўткы-
шым ойыреныт.

«Сылнымут шыже» семинар-
совещанийын лектышыже
тўвыргö лиш манын ўшанена.
Х.АЛЕКСАНДРОВА.

Палыза

6 октябрьыште марий сылнымутын классикше
С.Г.Чавайнын шочмыжлан – 135 ий.

С.Г.Чавайнын могай произведенийже гыч ужашым савыктыме!

«...Сентябрь тылзе мучаштырак йўд ден кече төр
лийыт. Август тылзе пытыме годым йўкшемдаш
тўналеш. Тыгыде йўр чарныде йўреш. Пасу пустанеш...
Лавыран, ночко шыже годым мланде, пушенге шуко пашам
ыштен нойышо еҗла койыт. Телылан шокшо
верышке кайыше кайык-влак мўндыр корнышко
тарванат. Чодыра чаранеш, пустанеш, шыплана.
Уремыште кеҗежымсыла погынен шинчыше уке...»



Сылне пагыт

Пушенгылаште
лышташ-влак тў-
сыштым ваштал-
теныт, мландымба-
ке эркын велыт. Шыже пўр-
тўс шонанпылым ушештара.
Йырым-йыр йошкарге,
нарынче, кўрен да моло тўс-
влак волгалтыт. Шыже
пагыт мыланем келша.

Маша САПАЕВА.
Волжский, Сотнур.



Илыдыме отрошто

Приключений сынан книгам лудаш йоратем. Молан? Онай, шергалме годым герой-шамыч дене пырля ойгырет, лудат, тургыжланет. Роберт Стивенсонын «Остров сокровищ» книгажым лудмем годым герой-влак дене пырляк лиймемла чучо. Тун герой Джим дене илыдыме отрошто шортным кычалме годым могай гына приключенийыш ышна логал?! Нелылыкым пырля сенышна. Йоча-влак, тыландат лудаш темлем.

Артём ИВАНОВ.

**Йошкар-Ола,
24-ше номеран школ.**



*Уш-акыл вий –
йылмыште.*

Е.МУСТАЕВ.

Кузе от кугешне?!

Ме школышто марий, руш, англичан йылмылам тунемына. Но эн лишыллан шочмо йылмым шотлем. Йодыш шочеш: ме тудым сайын палена мо? Йылмым шымлымылан, тунеммылан шагалрак туткышым ойырена, марий книгам шагалрак лудына, очыни. Мыйын шонымаште, шочмо йылме дене яндарын кутырен моштыман, сочиненийым йонгылыш деч посна возыман. Иктаж-могай шомакын кузе возалтмыжым от пале гын, орфографий мутерышке ончалаш да шарнен кодаш лиеш. Интернетыштат электрон мутер-влак кызыт ятыр улыт. Марий йылмынаже могай мотор! Марий радиом чон канен колыштына, телевизор дене онай передачым кугешнен ончена. Сылнымут произведений-шамыч моткоч сылне да шонаш таратыше улыт. Марий улмет дене кузе от кугешне?!

Настя ЯМАКАЕВА.

Кужэгер, Шудымарий.

Понгым погена

Петя, пашам пытарен, пашадарым полкыш пыштен, Полкан пийжым покталтен-покталтен, понгым погаш пыжалте. Пакчаште печым почын, полан пушенгым пугыртен, пеш пышен, пуракым пургыжтен пелгыш. Покла пелашыже пакча парникыште помидорым пога, пеледышым перега. Пасу пелен пашаче-влак паренгым погат.

Пуртус погылан пешак поян: понгыжо, поланже, почыжшо. Пукшермыже пызле пелен пызнен. Понгызо-вла-

кат пешак понгыртылыт. Пондашан пошкудо Павыл папкам пога. Петя понгым пала. Пундыш пелен пундыштунвонго пырля пешак погынат. Папкалан пич пычкемыште пиал петырналтын. Писте пелен пунтүрво палдырна. Понгым погышыжла, Петян пылышыжым пормо пурлю, парняжым пачемыш пүшкыльо. Пуале. Полканын пылышешыже, почешыже пунчо пугыльмыла пижыныт. Пий-влак почешыже пордыт.

Поян погым пакетыш пыш-

У вий дене



Фотом школ архив тыч налме.

Шургыял школышто «Марийсылнымутсадвечыште» кружок ятыр ий пашам ышта. Тудым Е.В.Григорьева вуйлата. У тунемме ий тунгалмеке, кружокыш уэш погынышна (снимкыште). Тушко 15 тунемше коштына. Мыйым старостылан сайлышт. Кружокышто марла чын да сылнын возаш тунемына. Возымо пашана-влакым түрлө газет редакцийышке колтена. Эртыше тунемме идалыкыште ме ятыр сенымашке шуынна. Эн куанлыже – В.Исенеков лумеш премийым сенен налмаш. Кружок вуйлатышыланна таум ойлена. Теният угыч у вий дене тыршаш тунгалына.

Анна АНИСИМОВА.

Морко район.

Шыже түс



Шортнө шыже только ялыш,
Шке вургемжым вашталтен,
Турлеман мотор коверыш
Шортным, чинчым шавалтен.

Йывыртен тылат ом тем мый,
Турлө-турлө түсетлан.
Нарынче, йошкар улат тый,
Лачак сылне капетлан.

Шыже түс чонем тарватыш
Утыр талын тунемаш,
Почо корным шинчымашыш.
«Визытаным» кондышаш.

Настя МИХАЙЛОВА.

Волжский, Корамас.

«П» буква дене

тен, Петя портышкыжө пурыш. Подыш понгым падыштен, пусө пурысым, приправым, паренгым пыштыш. Петя полем покшелан портсийым погыш. Пошкудо-влаклан пайремыштыже понгым пукшынеже.

Палыза: паша, порылык пырля пиалым палемдат.

Родион НЕБОГАТИКОВ.
**У Торьял,
Токтарсола.**





Йочасадыште - тургым пагыт

Йочасадышкат школ семынак, у тунемме ий тўналмеке, ньога-влак икымше гана толыт. Кажне икшывын - шке койыш-шоктышыжо, сандене йочасад деке тўрлө семын тунемыт. Адаптацияй йыжын иканаште огыл, эркын эрта. Тиде жап йочан веле огыл, тыгак ача-аван шўм-чоныштым корштарыше пагыт. Адаптацияй пагыт кум тўрлө лиш: куштылго, кокла, неле степеня.

Лаштыкым Медведево посёлкысо 6-шо номеран «Онгыр» йочам виангыме рўдерын кугурак воспитательже Ольга Валерьевна КАЗАНЦЕВА ямдылен.



Воспитательын эн тўн сомылжо - йочалан йочасад деке писын тунем шуаш полшаш. Тыгодым ача-авам алмаштыман, поро, тыматле мут дене йочам лыпландарыман, ныжыл шинчаончалтыш дене кажне кечын вашлийман, чон шокшым, йоратымашым пөлеклыман. Адаптацияй жапыште эн кугу польш - тиде модыш.

☺ Адаптацияй годым йоча-влак парня дене сўретлаш йоратат. Тўрлө сынан сўретым чиялташ пуаш лиш.

☺ Мече дене модмаш весела татым пөлекла.

☺ Тўшка пашашке ушыман. Мутлан, тўрлө тўсан кагаз гыч лышташлам пўчкeden, гирляндым ыштен, пөлемым сорастараш.



☺ Лышташла гыч шыже театрым келыштарыза. Тўрлө кугытан да тўсан лышташ-влак йомакысе персонажыш куштылгын савырнат да модыш театрыште орыктарыше историйым каласкален кертыт.

Модышым ышташ кўлеш: лышташ-влак, тўрлө пеледыш, мороженныйлык панга, вашкўзё, клей, ручка, чия але фломастер-шамыч да, мутат уке, изиш фантазий.

Йоча-влак, лышташыш чурийым фломастер але чия дене сўретлыза. Формым ыштен, вашкўзё дене тўрлыза да мороженный панга вует пентгыдырак пижыктыза. Тендан актёрда-шамыч шыже театран ямде улыт! Онай, нуно могай историйым каласкалаш тўналыт?

Йылмым лывыртена

Чодыра йўк

Кожла вует - гож-гож-гож,
Пўнчө лыгет - лыб-лыб-лыб,
Писте вует - лыж-лыж-лыж,
Шопке вует - быр-быр-быр,
Мемнан мутшат -

шыр-шыр-шыр...

С.ЧАВАЙН.



☺ Тўрлө тўсан лышташ-влакым тўшкан погаш кумыландаш. Вара воспитатель дене пырля панном, аппликацийым, топиарийым, пеледыш аршашым да молымат ышташ лиш. Сўретым ончыза. Лышташлам погымо годым йоча пушенге лўмым ушештара да пўртўс нерген уверым пален налеш.

Шиште

Шиште, шиште
Тук-тук-тук

(ик парня дене
ўстембалым пералтена)


Мемнан лишне

(кок парня дене пералтена)

Нерже дене пералта

(кум парня дене пералтена).

Чодыраште весела.



Нине лышташ-влак кудо пушенге гыч вельныт!

Писылудыш

Шонго шоншо шокшо шўрым пеш шолта.

☺ Сўретым ончен, йомакым каласкалаш лиш.



Йомак почеш

15 сентябрьште «Ямде лий» газетыште савыкталтше «Чондымо телефон» йомакым куанен лудым. Артём Иванов илышлан келшыше пүсө йодышым тарватен. Телефон тунемаште кугу чаракым ышта Адакшым тазалыклан энгекым конда. Вес могырым, пайдажат уло, но шагалрак. Артёмнын йомакше гыч улышым: телефон воктене жапым шагалрак эртарыман. Ача-аван мутыштым колыштман, кўштымыштым шуктыман. Шольо-шўжар-влак дене яра жапым эртарыман да нуным эскерыман.

Кира СМЕРНОВА.


Морко, Коркатово.

Жалык пале

○ Кол чўнгымым чарна гын, игече вашталтеш.

○ Кож пўгыльмө уло гын, ур толеш.

Сўретым чиялтыза.



Шыже кросс

Эртыше каныш кечылаште Советский район Ёшнур кыдалаш школ пелен районысо шыже кросс эртаралтын. Танасы-машке ятыр школ гыч йоча-шамыч погыненыт. Нунын коклаште Ёшнур школын кумшо классыштыже тунемше-влак Матвей Васильев, Алексей Волков да Миша Тренинов **(снимкыште)** лийыныт. Рвезе-шамычлан тўшка таңасымаш пеш келшен.



Ончыкыжым сенгыше-влак радамыш логалаш шонат. Изинек спорт дене пентгыде кылым кучаш да кажне кечын ямдылалташ кўлмым раш умылат.

С.ЕЛЬМЕКЕЕВА.
Авторын фотожо.

Палаш онгай

⊗ Мөр дене таңастарымаште сакыр лимоньшто шуқырак.

⊗ Мөршытө кокла шот дене 200 наре кичке уло.

⊗ Мөршытө йод уло. Тудо организмлан нойымо деч полша.

Изи озавате

«Ўяча»

Кўлеш: 2 муно, 260 грамм ложаш, 200 грамм сакырложаш, 100 грамм ушкал ўй, пел изи совла содо, уксус.

Муным, сакырым миксер дене лугыза. Ўйым ешарыза, уксус дене шулыктарыме содым, ложашым ешарыза. Руаш гыч ўячам ыштыза да 20 минутлан ду х о в к ы ш шындыза.



Ребус



МАРИЙ ЭЛ РЕСПУБЛИКЫСЫН ТУВЫРА, ПЕЧАТЬ ДА КАЛЫК-ВЛАКЫН ПАШАШТ ШОТЫШТО МИНИСТЕРСТЫЖЕ
М.Шкетон кумды
Марий кужыкшы драме театр

| ОКТАБРЬ | | С. Чондымо | С. Чондымо |
|---------|-------|---|------------|
| 6 | 18:00 | МУКШ ОТАР / Пасасе | 1 ч. 45 м. |
| 7 | 16:00 | МҮНДЫР ЯЛЫШ ТОЛЫН КАЧЕ / Тудым, уртыме, а чарна | 1 ч. 45 м. |
| 8 | 11:00 | ЗОЛУШКА / Сабиле | 1 ч. 45 м. |
| 8 | 16:00 | ПОСАДИТЬ ДЕРЕВО / На руссике вкыла | 1 ч. 45 м. |
| 14 | 16:00 | УШ ЙОММЕШ ЙОРАТЫМАШ / Уртыме, уртыме, а чарна | 1 ч. 45 м. |
| 15 | 16:00 | ОСКАР И РОЗОВАЯ ДАМА / Пасасе Бору | 1 ч. 45 м. |
| 18 | 18:00 | ЮМЫНҮДЫР / Дача Бору | 1 ч. 45 м. |
| 19 | 18:00 | ТЕРГЫШЕ / Рынкор | 1 ч. 45 м. |
| 20 | 18:00 | КИТАЙ КУВА / Китайские бобуаш | 1 ч. 45 м. |
| 21 | 16:00 | СПАСТИ КАМЕР-ЮНКЕРА ПУШКИНА / Родимый | 1 ч. 45 м. |
| 22 | 16:00 | ШУДЫРАН ТАТ / Заданый час на театральном уровне | 1 ч. 45 м. |
| 25 | 18:00 | ЙОРАТЫМАШЫН АКШЕ / Дача Бору | 1 ч. 45 м. |
| 27 | 18:00 | ЭРЕНГЕР / Дача Бору | 1 ч. 45 м. |
| 28 | 16:00 | АЧИЙЖАТ-АВИЙЖАТ / Эск. родимый | 1 ч. 45 м. |
| 29 | 16:00 | УШ ЙОММЕШ ЙОРАТЫМАШ / Родимый | 1 ч. 45 м. |

Рекламе.

«Ямде лий» газет
Тўн редактор
Л.Н.ГРИГОРЬЕВА.
Индекс: П4696.
Тираж 1550 экз. Заказ
Формат – А-4-8.

https://vk.com/yamde_lii
<https://t.me/yamdelii>
E-mail: yamde_lii@mari-el.ru
(документ кагазлан),
yamde_lii@mail.ru
(автор-влаклан)
Сайтын адресше: yamdelii.ru

УЧРЕДИТЕЛЬ:
Марий Эл Республикысе
Культур, печать да
калык-влакын пашашт
шотышто министерстве.

Газетым редакцийште
погымо да версталыме,
«Марий Эл Республикысе
Правительствын типографийже» ООО-што ямде
оригинал-макет гыч савыктыме. Типографийын
адресше: 424000, Йошкар-Ола, Комсомольский урем, 112.

Газетым Кыл, информационный
технологий да массовый коммуникаций
сферым эскериме шотышто федеральный
службын Юл кундем федеральный
округысо управленийыштыже регис-
трироватлыме.
Номер – ПИ № ТУ52-01335,
2021 ий 29 сентябрьште пуымо.

0+

Печатьш пуымо жап –
14-00,
фактически – 13-00

Авторын да редакцийын шоня-
мышт тўрл лийын кертыт. Серыш-
влак монтеш огыт колталт.
Ак – кутырен келшыме почеш.
Редакцийын да издательнын адресше:
424006, Йошкар-Ола, СССР Вооружённый
Вийын 70-ше идалькыше урем, 20-шо пёрт.
Тел. 8(8362) 45-22-82.




Ева СТЕПАНОВА (Морко, Купсола) — туныктышыжо Г.Н.Сергеева дене пырля.



Богдан ПЕТУХОВ (Советский, Шуарсола) — туныктышыжо Л.Ф.Столярова дене пырля.



Анжелика КРАСНОСЛАБОД-ЦЕВА (Медведево, Руэм) — туныктышыжо С.Н.Долонина дене пырля.




Келшыше ужашым кычалза.

Кавун

Тений авам кавуным шынден. Шыжылан тудо кушкын, кугу лийын. Нарынчалге тўсан йыргешке пакчасаскам еште тамленна. Вет тудо тўрлө витаминлан поян. Шере кочкыш чылаланна келшен.

Даша САДОВИНА. Советский, Орша.




Ик шырпым верже дене вашталтен, чын вашмутым ыштыза.



Понгым кор- зингаш погыза.

Тушто

Шийым шындем – шортньо пеледеш.



Машиналан финишш миен шуаш полшыза.

Васялан – 5 ий. Анялан – 9 ий. Кум ий гыч нунын коклаште ийгот ойыр- тем мыняр лиеш?



Шотлыза да клеткылашке возыза.

